

# Stubb

## Brita i Bu

Eg vil gifte meg med Brita i Bu  
som har bruksrett til Britebu plass  
og har verpande høns og ei ku  
og ei dunseng med dubbel madrass.

Og forsona med livet og lat,  
skal eg dra meg på dunstoppa bol,  
og få heimekokt britebumat,  
til eg skin som ei nysprotta sol.

Nei, eg vil gifte meg med Lisa i Li,  
som har krambu med snop i kvar krå,  
og har part i eit stort bakeri,  
fullt av kringler med strøsukker på.

Og forproppa i magen og stinn,  
skaleg sitje i krambua støtt,  
og ta for meg som likast eg vinn  
utav alt som er suligt og søtt.

Nei, eg vil gifte meg med Dorta i Deld,  
som har strikkemaskin og gitar,  
og syng Songen om Sion kvar kveld,  
og er mor til ein gut utan far.

Og til tonar av åndeleg spel  
skal eg strekke meg stokkande stiv,  
og klarere mi syndige sjel  
for det sokalla åndelege liv.

Nei, vil gifte meg med alle i hop,  
og gå klar både hunger og frost,  
leve gratis på kringler og snop,  
og på heimekokt britebukost.

Få meg sokkar av seigaste sort,  
og på kjøpet bli reinspikka far,  
for til slutt å gå lukkeleg bort  
etter tonar av Dortas gitar.